

## HPILIPI Pê Chyáng Hun Kat é Laiká (Philippians)

<sup>1</sup> Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhunglhang eq, hpúng-up, hpungte pé lé, dang kyô kat lhê.

<sup>2</sup> Nga-nhông é Îwa Garai Gasang eq Yhumsing Yesuq Hkrisduq chyáng mâ é jeju eq nuingón hkyô gi, nungmoq chyáng ru joq nyi sháng gaq ô.

### *Jeju Hkya-ôn É Hkyô*

<sup>3</sup> Ngò gi, nungmoq lé myit bûn kat hkanmó, ngá é Garai Gasang lé jeju hkya-ôn nyi lhê. <sup>4</sup> Ngò gi, kyûdung hkanmó, hkâ-nhâm le nungmoq banshoq bang é matú gabú myit eq dung byi nyi lhê.

<sup>5</sup> Hkâsu mù gâ le, nungmoq gi, sâng-hi nyi mai ahkuí jé shoq, gabú danglù má ngò eq chôm zùm yap nyi é yanmai nghut lhê. <sup>6</sup> Haû nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haû lé lhoq pán rá nghut lhê nghû, ngò hkyak myit lum tô lhê.

<sup>7</sup> Nungmoq banshoq bang gi, ngá é i-myt má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gâ le, ngò kyum hut huí tô é u lé le, haû gabú danglù hkyô lé taí húng luí, lhoq gíng é u lé le, nungmoq gi, ngò eq rahá Garai Gasang jeju chôm hkâm yu é bang nghut lhê. <sup>8</sup> Hkrisduq Yesuq é chyitdap myit dông, nungmoq banshoq bang lé,

ngò hkâ-í myit chyt nyi é hkyô lé, Garai Gasang gi, ngá é saksé nghut lhê.

<sup>9</sup> Hau htoq agó, nungmoq gi, je ge é hkyô lé dat gam hkoq mù, Hkrisduq é buinyì má sanséng luì mara a bo é za, <sup>10</sup> Garai Gasâng é hpung-wup shingkang eq hkya-on kungtôn hkyo é matú, Yesuq Hkrisduq é yanmai lo é dingmán hkyo é ashi wó byíng nyì sháng gaq nghû le; <sup>11</sup> nungmoq é chyitdap myit gi, tengmán é hpaqchyì eq wó sê é nyan banshoq má je riyhang kô jat lò sháng gaq nghû le, ngò kyûdûng nyi lhê.

### *Dui Nyi Le Gi, Hkrisduq É Matú*

<sup>12</sup> Gumang wuì ê, ahkuì ngò nungmoq lé sé nhâng nau é hkyô gi, ngò má haì dut lài lò bê hkyô pé gi, gè gè yhang gabú danglù ríng jat lò râ matú dut lò bê nghut ri. <sup>13</sup> Hau é yanmai, haù hkohkâm-wâng zúng é lhunglhâng bang eq gotû banshoq bâng é hí má, Hkrisduq é yanmai ngò kyum hut huì é hkyô, de de dut htoq bê nghut ri. <sup>14</sup> Hau htoq agó, ngò htóng lúng é yanmai, haù Yhumsíng Yesuq má gumang wuì nghut é myo mi-myo gi, myit wum wó yû kômù, Garai Gasâng é mungdang lé, je riyhang a gyuq a kyum wám hko kyo bekò nghut ri.

<sup>15</sup> Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôhang, byù ra-am gi, ge é myit mai hko kyô bum akô nghut ri. <sup>16</sup> Ge é myit mai hko é bang gi, gabú danglù lé hûng râ matú ngo lé hkyin é hkyô lé, yhangmoq sé kômù, chyitdap myit èq hko kyô é bang nghut akô. <sup>17</sup> Haù góbang chyaú gi, sansêng é i-myit eq a nghut é za,

ngò kyum wut é hkyô má wuîhke jamjau jat byi râ matú, myit nyi bùm kô é nghut mù luí, Hkrisduq é hkyô lé yhumsing é wuízat é dông za, hko taí nyi bum akô nghut ri. <sup>18</sup> Nghut kôlhang, haû gi, haí râ ri lú? Yhumsîng wuízat é dông hko é nghut nghut, tengmán é dông hko é nghut nghut, hkyô hkat hkgámó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirâ nghut lhê. <sup>19</sup> Hkâsu mù gâ le, nungmoq kyûdung byí é eq Yesuq Hkrisduq é Woi-nyí garúm é yanmai, ngò má dut laí lò bê hkyô gi, ngò wó luthkyô dut râ nghut é lé ngò sê lhê. <sup>20</sup> Ngò myit láng tô é eq myit myoqbyù tô é má, ngò gi, hoq nó haí a râ é za, hí hkun lhê su, ahkuí le, dui nyi kôlhang, shi byuq kôlhang, gyuq kyum myit a bo é hkyô lé wó yû mù luí, Hkrisduq gi, ngá gûng má hkya-on waq toq é hui râ nghut lhê. <sup>21</sup> Hkâsu mù gâ le, ngò, asak dui nyi le gi, Hkrisduq é matú, shí jáng gi, ngá e amyat nghut ri. <sup>22</sup> Nghut kôlhang, ngò gi, gungsho má rû dui nyi mù, ngò kut é muzó má ashi zuí lo é nghut le gi, hká lhum lé sheq hkyin yu le gè râ lú? <sup>23</sup> Ngò gi, hkyô í hkat gyoro má hká hpyang le a hkap dut tô ri; shi ló luí Hkrisduq eq rahá nyi râ lé gi, ngò ô nau ri, hkâsu mù gâ le, haû gi, je ge é hkyô nghut ri. <sup>24</sup> Nghut kôlhang, ngò gungsho má dui nyi le gi, nungmoq é matú akyû je bò râ nghut lhê. <sup>25</sup> Haû mù, ngò gi, shí hkyô lé hkyak myit lum to luí, lumjîng hkyô má nungmoq kô jat lo é eq gabú nyi râ matú, nyi gyó luí, nungmoq lhunglhang bang eq nyi nyi râ hkyô lé, ngò sê lhê. <sup>26</sup> Haû mù luí, ngò nungmoq chyáng dum jé lé é

hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

<sup>27</sup> Haî wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haû jáng, ngò, nungmoq chyáng jé mù huî lhûm é hkûn nghut nghut, we gang lhum tô é hkûn nghut nghut, nungmoq gi, woi-nyí ralhum má za yap gîng to mù, haû gabú danglù lé lumjîng hkyô má, i-myt rahkat zâ èq shikut nyi kô é hkyô lé le; <sup>28</sup> nungmoq gi, hká hkyô má nghut kôlhang, gyè pê èq kyuq zô é lé a gyuq lò kô é hkyô lé le, ngò sé râ nghut lhê. Haû gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haû gi, Garai Gasang kut é nghut lhê. <sup>29</sup> Hkâsu mù gâ le, Hkrisduq má wó lumjîng râ é jeju za a nghut, Yhang é matú wuîhke jamjau hui râ jeju le, nungmoq hkam yù bekô nghut ri. <sup>30</sup> Haû gi, hí hpyang nungmoq ngò má myang wú é eq, ahkuî nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

## 2

### *Yesuq, Myit Lhoq Nyhum É Hkyô*

<sup>1</sup> Hkrisduq eq rading ralhum za nghut nyi é yanmai, myit wum byî é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhikmyîn é hkyô rajung jung lé, nungmoq wó yu é nghut le gi, <sup>2</sup> nungmoq gi, haû i-myt huî é hkyô rahkat za, chyitdap myit rajung za, myit nhiklhum eq myit é hkyô má ralhum za kut nyi é dông, ngá é gabú hkyô lé, byíng jup nhâng keq. <sup>3</sup> Yhumsing é wuizat é dông

le, akôm gyáng pyâm é dông le, haî le a kut é za, myit lhoq nyhum nyi mù, góbang gi, nungmoq htoq má je gyaú lhê nghû myit yu nyi keq. <sup>4</sup> Nungmoq yuq hkanmó gi, yhumsîng eq sêng é lé za a nghut, góbang eq sêng é lé le, myit byi râ lhê.

<sup>5</sup> Hkrisduq Yesuq má bo é myit yhang, nungmoq chyáng bò râ dut lhê.

<sup>6</sup> Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi râ matú a myit é za,

<sup>7</sup> Yhânggùng lé lhoq gôm pyám luí, dui-nhâng zôshang é gunghkyâng lé yu chûng mù, xângzo byù gùng roq lé dut bê nghut ri.

<sup>8</sup> Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí, haú tapzing htoq má lhang tap sat pyâm é hui shoq jîno gyô ri.

<sup>9</sup> Haú mù luí, Garai Gasang gi, Yesuq é myîng lé mauhkûng htoq mâ é hkyihput, myidàm htoq mâ é hkyihput eq moming mâ é hkyihput hkanmó htuq paí luí,

<sup>10</sup> haú Îwa Garai Gasâng é hpungwup shingkâng é matú, Yesuq Hkrisduq gi, Yhumsîng nghut lhê nghû,

nhut shô hkanmó yín yû sháng gaq ga,

<sup>11</sup> myhang htâng é jowò má Yhang lé lhoq toq tô é eq, myîng lhunghâng é htoq má gyaú é myîng haú,

Yhang lé byi to bê nghut ri.

*Kyî Pé Su Duqbó Nyî Râ Hkyô*

<sup>12</sup> Haú mù luí, ngò chyitdap é luzúm wuî ê, nungmoq gi, hkâ-nhâm le jîno gyô nyi é eq rajung

za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyai gyuq hkunggâ é myit eq je riyhang lhoq htoq nyi keq. <sup>13</sup> Hkâsu mù gâ le, Garai Gasang gi, Yhang ô nau é hkyô lé, kut naû râ myit èq wó kut râ hkyô lé nungmoq má lhoq htoq byi nyi é sù nghut lhê.

<sup>14</sup> Haî kut kôlhang, taí put lhûm é dông, haû a nghut jáng, dang jet jet lhûm é dông hkâkut kó. <sup>15</sup> Haû jáng sheq, myit goí é, agè ashop é pyat hkaú má, nungmoq gi, mara a bo é, sân-yúng é, shut hkyô a bo é, Garai Gasâng é yhangzô pé dut kó râ nghut lhê. <sup>16</sup> Hau htoq agó, nungmoq gi, asak mungdang lé chung htoq uchyang, mauhkúng mâ é kyí pé su, yhangmoq chyáng wó duqbó nyi kó râ nghut lhê. Haú hkûn, ngò gi, ajè a dín pyâm é, a nghut jáng, muzó lé akôm a zui pyâm é yanmai, Hkrisduq é buinyi má gumrông jowò wó berâ nghut lhê. <sup>17</sup> Nghut kôlhang, ngò gi, shuq jung hkungga\* ralhum su, nungmoq é lumjíng myit mai nhongjaú byi é shigu hkungga ahtoq má hut gyûn pyâm é hui le lhang, gabú luí, nungmoq banshoq bang eq rahá chôm gabú nyi lhê. <sup>18</sup> Haû eq rajung za, nungmoq le gabú luí, ngò eq rahá chôm gabú nyi râ dut lhê.

### *Timohti Eq Epahprodi Njik Lé Nhang Kat Râ Gâ É Hkyô*

---

\* **2:17** Shuq jung hkungga gâ é gi, tsibiyiq wing ragóm lé myi htoq má hut pyâm é dông Garai lé gyuq hkunggâ é hkyô lé tûn shit é nghut lhê. Bun zo shí má shí hkâm é hkyô lé taí nau é nghut lhê.

<sup>19</sup> Ngò gi, nungmoq chyáng Timohti lé hân za wó nhang kat râ lé, haû Yhumsîng Yesuq má myit myoqbyu nyi lhê; haû hkûn sheq, nungmoq eq sêng é ludang lé ngò wó sé jáng, ngò myit ngón râ nghut lhê. <sup>20</sup> Nungmoq é hkyô lé, yhang su hkyak za ge myit chiq byî é byù gotû rayuq le ngò a wó. <sup>21</sup> Hkâsu mù gâ le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akô nghut ri. <sup>22</sup> Yhang kúm gi, zo rayuq mai îwa lé htuqbâng é su, haû gabú danglù hkyô má ngò eq rahá dojaú é yanmai, yhang lumluq é hkyô tûn shit é lé, nungmoq sê nyi lhê. <sup>23</sup> Haû mù luî, ngò gi, ngò má hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê. <sup>24</sup> Hau htoq agó, hkâ-myháng a myáng má, ngò yhang le nungmoq chyáng wó jé nhâng râ nghut lhê nghû, haû Yhumsîng má hkyak lum nyi lhê.

<sup>25</sup> Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taû kat byi râ lhê nghû, ngò myit hpyit to bê nghut lhê. <sup>26</sup> Hkâsu mù gâ le, yhang gi, nungmoq lhunglhang bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri. <sup>27</sup> Gè gè yhang, yhang gi, aluq shoî shî shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi râ matú, ngo lé le

shogyo nhikmyîn yu ri. <sup>28</sup> Haû mù luî, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò hân hân nhang kat byí nau ri. <sup>29</sup> Nungmoq gi, gyai yhang gabú é myit èq, haû Yhumsîng má yhang lé lhom hkûlum yù mù, yhang su dut é bang lé hkungga keq. <sup>30</sup> Hkâsu mù gâ le, yhang gi, ngo lé nungmoq a wó garúm é hkyô lé garúm râ matú, yhâng é asak lé lháng a ha loshoq kut mù, haû Hkrisduq é muzó é yanmai, aluq shoî shoî shi é hui zô ri.

### 3

#### *Gungsho Má Lumhkaû Râ Hkyô A Joq*

<sup>1</sup> Hau htoq agó, ngá é gumang wuî ê, haû Yhumsîng má gabú nyî keq! Rajung zâ é hkyô lé, nungmoq é matú dum puq ká byi râ gi, ngò má wuî é hkyô haî a joq, nungmoq é matú akyû dut râ matú sheq ru nghut lhê.

<sup>2</sup> Haû, hkuî pé lé le; agè ashop é muzó jizó kut é bang lé le; gungsho yâm é bang lé le; sidiq nyî keq.\* <sup>3</sup> Hkâsu mù gâ le, Garai Gasâng é Woi-nyí èq noqkuq é bang, Hkrisduq Yesuq má gabú gumrong nyî é bang, gungsho má a lumhkaû é bang, nga-nhúng gi, ahpyo-kuq hpyit hkam yu é bang akying† nghut lhê. <sup>4</sup> Ngò kúm gi, gungsho má lumhkaû râ hkyô wó ang sù nghut lhê.

Góbang rayuq yuq, haû gungsho má lumhkaû râ hkyô wó âng lhê ga myit é nghut le gi, ngò gi,

---

\* **3:2** Bun zo shi lhum gi, ahpyo-kuq hpyit hkyô má noqzuq nyi é bang lé taí nau é nghut lhê. † **3:3** Ahpyo-kuq hpyit hkam yu é bang akying gâ é gi, Garai Gasâng é yhangzo hkyak nghut bê bang lé gâ lhê.



je riyhang wó sù nghut lhê. <sup>5</sup> Ngò gi, hkû lé é htâng shit nyí nghû râ nyí má ahpyo-kuq hpyit bê sù; Israelaq amyû mâ é, Ben-yamyin é awut ashín nghut sù, Hebre byù mâ é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê; <sup>6</sup> shirong é hkyô eq séng luí ga jang, ngò gi, haû noqkuq hpúng lé zing-rî wú bê nghut lhê; jep é tarâ mâ é dingmán hkyô eq séng luí ga jang, ngò gi, shut é hkyô a bo wú sù nghut lhê.

<sup>7</sup> Nghut kôlhang, ngá é amyat nghu é pé lhunglhang gi, ahkuî, Hkrisduq é yanmai sùm byuq é chyat nghut bê nghû myit yù bê nghut lhê. <sup>8</sup> Hau htoq agó, ngò gi, ngá é Yhumsing Hkrisduq Yesuq lé wó sê é ko dik é jeju lé sôn kat jáng, jung hkangmó lé buzaq dông myit yù bê. Hkâsu mù gâ le, lhunglhang lé ngò tô pyâm é gi, Yhang é yanmai nghut lhê. <sup>9</sup> Ngò gi, Hkrisduq lé wó yû râ eq, Yhang eq rahá wó nghut nyí râ matú, haû jung hkangmó lé buzaq nghû myit yu pyám bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjín é yanmai za wó yu é ru nghut lhê; haû gi, lumjín myit mai wó é nghut lhê. <sup>10</sup> Ngò gi, Hkrisduq lé le, Yhang dui toq hkyo é hpungwup a-tsam lé le, Yhang hpuzô é hkyô má wó zùm yap râ lé le, Yhang shî hkâm é hkyô lé wó cháng râ lé le, sé nau ri. <sup>11</sup> Haû jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

### *Myit Myoqbyu Tô É Jowò Shut Din Nyì Râ Hkyô*

<sup>12</sup> Ngò gi, haû pé banshoq lé wó gû bê le a nghû naù, ngò gumjup gù bê le a nghû naù. Nghut kôlhang, Hkrisduq Yesuq gi, ngo lé lhom yù bê

eq rajung za, ngò gi, haù lé wó lhom yù sháng gaq nghù, châng hkat nyi lhê. <sup>13</sup> Gumang wui ê, ngò yhang ngò gi, haù lé wó hap yù bê nghù a myit; nghut kôlhang, ngò kut é muzó ralhum gi, nunghtáng mâ é lé tô-myhî pyám mù, myoq hí mâ é lé wó yû shoq nghù shikut luî, <sup>14</sup> Hkrisduq Yesuq má Garai Gasâng èq ngo lé ahtoq shut ji yu é chyunghuq lé wó yû râ matú, myoqbyu tô é jowò shut châng hkat din nyi lhê.

<sup>15</sup> Gumjup bê bang nga-nhúng lhunglhang gi, haù sù é myit bò râ lhê. Rajung jung má nungmoq myit é hkyô shai nyi kô é nghut le gi, haù lé le, Garai Gasang gi, nungmoq lé san za tân shit râ nghut lhê. <sup>16</sup> Hká dông nghut kôlhang, nga-nhúng gi, ahkuî jé shoq châng nyi bê hkyô eq rajung za châng kut nyi sháng.

<sup>17</sup> Gumang wui ê, nungmoq gi, ngò kut é dông chôm kut nyi keq, ngamoq maì nungmoq lé kut shit é alik eq rajung za châng é bang lé wú yû keq. <sup>18</sup> Hkâsu mù gâ le, hí hkûn ngò, nungmoq lé anum num taì kyô wú luî, ahkuî lhang, ngaù byî èq dum taì kyô é eq rajung za, Hkrisduq é tapzîng lé gyè kut é bang myo myo nyi bum akô nghut ri. <sup>19</sup> Yhangmoq é jìhtûm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myt gi, mingkan zè htoq má za nghut ri. <sup>20</sup> Nghut kôlhang, nga-nhúng é yhummau gi, mauhkûng mingdán má nghut lhê. Nga-nhúng gi, haù mâ é Yhumsîng Yesuq Hkrisduq gâ é hkyi yù Sù lé, myoqbyu lág nyi é bang nghut lhê. <sup>21</sup> Yhang gi, jung hkangmó lé, Yhang uphkang

é a-ô má wó kut tô é Yhâng é a-tsâm eq nga-nhông é htên byoq sê é gungdu lé htaî lhik pyám byi lui, Yhâng é hpungwup bo é gungdu su dut nhâng rá nghut lhê.

## 4

<sup>1</sup> Haû mù lui, chyitdap é luzúm wuî le nghut mù, ngò chyitdap bûn nghâm nyi é, ngá é gabú jowò eq janmaú nghut nyi é, ngá é gumang wuî ê, haû gi, Yhumsîng má nungmoq hkâsu kut yap gîng nyi rá hkyô nghut lhê.

### *Lhoq Pun Lhoq Kyîng É Hkyô*

<sup>2</sup> Ngò gi, Uodia eq Suntuki nhik lé, haû Yhumsîng má rayuq eq rayuq myit huî lhûm nyi rá matú, gyai yhang pyîng kat lhê. <sup>3</sup> Ngá é mù wùn luzúm kyîng ê, ngò gi, myiwe shí nhik lé garúm yû laq nghû, nang lé le dúng tôngbán kat lhê; yhangnhik gi, Klemen eq le, asak jihpán laiká buk má myîng bo é, ngá é mù wùn luzúm wuî góbang eq le, haû gabú danglù hkyô má ngò eq rahá gyai shikut wú bê sù nhik nghut lhê.

<sup>4</sup> Haû Yhumsîng má hkâ-nhám le gabú nyi keq! Ngò dum taî lhê, gabú nyi keq! <sup>5</sup> Nungmoq nú-nhâm é hkyô, byù banshoq bang lé sé nhâng keq. Haû Yhumsîng gi, chyáng bê nghut ri. <sup>6</sup> Haî eq séng lui le, myit hkâ-myô hkâchiq kó; hkyô hkangmó má jeju hkya-on uchyang, kyûdúng é eq dúng tôngbán é dông, nungmoq dúng é hkyô pé lé, Garai Gasâng chyáng shit kyô nyi keq. <sup>7</sup> Haû hkûn, sé gyô é nyan banshoq htoq má gyaú é, Garai Gasâng é nguîngón hkyô gi, nungmoq é myit nhiklum eq nungmoq

myit é hkyô lé, Hkrisduq Yesuq má upzúng byî nyi râ nghut lhê.

<sup>8</sup> Jihtûm má, gumang wui ê, tengmán é, hpautap gíng é, dingmán é, sansêng é, wó chyitdap é, hkungga gíng é, haî má nghut kôlhang, aróng wó dik é hkyô rajung jung, a nghut jáng, hkya-on gíng é hkyô rajung jung bo é nghut le gi, haû sù é hkyô pé lé myit nyi keq. <sup>9</sup> Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haî lé le châng kut nyi keq. Haû hkûn, nguóngón hkyô byî é Garai Gasang gi, nungmoq eq rahá nyi nyi râ nghut lhê.

### *Jeju Bûn É Hkyô*

<sup>10</sup> Ahkuî kúm gi, ngá é hkyô lé nungmoq dum myit chiq byi kô é yanmai, ngò gi, haû Yhumsîng má gyai yhang gabú nyi lhê; gè gè yhang, nungmoq myit chiq byi nyi kôlhang, haû lé tûn shit râ ahkáng a wó kó nghut ri. <sup>11</sup> Ngò îsu nghû taî nyi é gi, ngò má râ é hkyô bo tô é yanmai taî é a nghut, hkâsu mù gâ le, ngò gi, ngò hui mihui má, nhik dik nyi râ matú mhoq yù bê nghut lhê. <sup>12</sup> Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkangmó eq dut tô é ahkyo lhum jup má, wam gyi kôlhang, zòmut kôlhang, agùn agó wó tô nyi kôlhang, ra châ to kôlhang, myit dik nyi râ hpaqchyî lé ngò wó mhoq yù bê nghut lhê. <sup>13</sup> Ngò gi, ngo lé wum-o a-tsam byi sù Hkrisduq é yanmai, hkyô hkat hkangmó wó kut lhê.

<sup>14</sup> Nghut kôlhang, ngò wuîhke jamjau huî nyi é hkûn, nungmoq garúm yù kô é gi, ge é hkyô kut bekô nghut ri. <sup>15</sup> Hau htoq agó, Hpilipi byu pé

nungmoq sê é eq rajung za, haû gabú danglù lé, ngò hkô mù nungmoq wó gyô yu hi é buinyì pé má, ngò Makedoni mau mai htoq ló râ hkûn, haû byî é hkyô eq lhom yu é hkyô má, nungmoq mai lai luî, noqkuq hpúng gotû ralhüm lháng, ngo lé garúm kat é hkyô a bo é nghut lhê. <sup>16</sup>Ngò Htesaloni wà mó má nyi tô é hkûn lé lháng, nungmoq gi, ngò ra châ é hkyô lé adàm dàm hûn byi bekô nghut ri. <sup>17</sup>Ngò gi, chyunghuq chyunghtâng lé ho nyi é a nghut, nungmoq mai ashi je myo zuî jat râ matú lé za sheq ho nyi é nghut lhê. <sup>18</sup>Ngò gi, haî le gúm shoq myang yu é htoq agó, chyan shoq lháng nghut bê. Ahkuî, haû nungmoq hun kat é chyunghuq lé, Epahprodi chyáng mai ngò lhom myang yù luî, ngò má agùn agó nghut nyi bê. Haû pé gi, namngón jung hkungga su, Garai Gasang lé gabú nhang é, hap yù gíng é hkungga ralhüm nghut ri. <sup>19</sup>Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

<sup>20</sup>Hpungwup shingkang gi, nga-nhùng é Îwa Garai Gasâng chyáng pyat dedu ahtum abyuq ru joq nyi sháng gaq ô! Amen.

### *Shi-kyám Dang*

<sup>21</sup>Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wuî gi, nungmoq lé shi-kyâm kat akô nghut ri. <sup>22</sup>Sân-yúng bang banshoq gi, nungmoq lé shi-kyâm kat akô; Kehta q é yhùm mâ é sân-yúng bang gi, je riyhang shi-kyâm kat akô nghut ri.

<sup>23</sup> Yhumsîng Yesuq Hkrisduq é jeju gi, nungmoq  
banshoq bang eq rahá ru joq nyî sháng gaq ô!

# **Chyoiyúng chyumlaiká: dangshikaq asik; Zaiwa**

## **New Testament in Zaiwa**

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

### **The New Testament**

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

23f9fc55-a8a4-59ef-9513-707ec336b0ee